



Inatsisartunut ilaasortaq Agathe Fontain, (IA)
-/Maani

Nakorsanut atorfiit inuttaqanngitsut pillugit § 37 naapertorlugu apequtip 2016-112-ip akineqarnera

Asasara Agathe Fontain,

Inatsisartut suleriaasiat naapertorlugu nakorsanut atorfiit inuttaqanngitsut pillugit apeq-qutinnut qujanaq. Apeqqutitit ataani akissavakka.

11-05-2016
Suliap nr 2016 - 7195
All. nr. 2649961

Postboks 1160
Oqarasuaat: 34 50 00
Fax: 34 55 05
3900 Nuuk
Email: pn@nanoq.gl
www.naalakkersuisut.gl

1. Nunatsinni nakorsanut atorfiit qasserpiaat inuttaqanngillat?

Akissut: Nakorsanut atorfiit tamarmik inuttaqarput, imatut paasillugu; nakorsanut atorfiit tamaasa nakorsanik aalajangersimasumik atorfinitsitanik inuttaqanngikkaangata taar-taasartunik imaluunniit sivikitsumik atorfinitsitanik inuttaqartarlutik.

a. Illoqarfiit sorlerpiaat pineqarpat?

Akissut: Illoqarfinni tamani atorfinnik taartaasartunik imaluunniit sivikitsumik atorfilinnik inuttalersugaqarpoq. Qaanaami, Ittoqqortoormiini, Aasianni, Paa-miuni, Nanortalimmi Narsamilu massakkorpiaq nakorsanik aalajangersimasu-mik atorfeqartoqanngilaq. Aasianni nakorsanik ataatsimik marlunnilluunniit juu-nip aallaqqaataaniit aalajangersimasumik atorfinittoqassaaq.

b. Atorfiit sorlerpiaat pineqarpat

Akissut: Illoqarfinni taaneqartuni atorfiit tassaapput nunap immikkoortuini na-korsat. Tassunga ilaapput Dronning Ingridip Napparsimmavissuani nakorsanut immikkut ilisimasalinnut atorfiit taartaasartunit sivikitsumillu taartaasartunit inut-talersorneqarsimasut. Immikkut ilisimasaqarfinni tarrarsuisarnermi, saarnginut, timip ilormiuinut katsorsaannermut, siutitigut-qinngatigut-toqqusaatigut, sinitsitsi-nermut aamma tarnimikkut napparsimasunut nakorsaqarnek pineqarput.

2. Ullumikkut nutserisut akornanni qanoq amerlatigisut kalaallisuumiit tulut-tuumut killormullu nutserisinnaappat?

Akissut: Kalaallit Nunaanni peqqinnissaqarfimmi ullumikkut kalaallisuumiit tuluttuumut toqqaannartumik oqaluttaasinnaasunik atorfeqartoqanngilaq. Nutserisutut ilinniarsima-sunik allanillu oqaluttaanermut nutserinermullu ilinniarsimannngitsunik danskisut kalaal-lisullu oqaaseqartunik atorfeqartoqarpoq.

Kalaallisuumiit tuluttuumut nutserisinnaasunik oqalutsitut ilinniartitsinermi
Ilisimatusarfimmi Nutse-rinermut Oqaluttaanermullu ilinniarfik suleqatiserinissaa

kissaatigaarput, siunissami kalaallisuumiit tuluttuumut tuluttuumiillu kalaallisuumut nutserisinnaasut pigilernissaat anguniarlugu.

Ullumikkut pissutsit imaapput, Kalaallit Nunaanni peqqinnissaqarfiup nakorsat Danmarkimi akuerisat kisiisa atorfinitsissinnaavai. Nakorsaq Danmarkimi akuerineqarniaruni Kalaallit Nunaannilu sulisinnaassaguni danskisut oqalussinnaasariaqarpoq. Piumasaqaammut taartaasinnaasutuaq tassaavoq nakorsaq nunanit avannarlerninngaannersusariaqarnera. Nakorsalli tuluttut oqaasillit Kalaallit Nunaanni sulisinnaassappata suut naammas-sineqaqqaartariaqarnerannik misissuisoqarnissaanik kissaateqarnikuuvunga.

3. Nakorsat ullumikkut atorfeqareersut Nunallu immikkoortuini atorfeqartut illoqarfinni najorusutaminni tamarmik najugaqarpat.

Akissut: Peqqissaavinni nunallu immikkoortuisa napparsimaviini tamani atorfinitsitasarsiortoqarnera pissutigalugu nakorsat atorfimmik qinnuteqarnerminni namminneq aalajangersinnaasarpaat napparsimavik sorleq suliffigerusunnerlugu.

Peqqinnissaqarfimmi aqutsisut sooq nakorsat suliffiit assigiinngitsut qinertarneraat imaluunniit qinertannginneraat sukumiisumik misissorsimanngilaat. Kisianni napparsimavinnik qinersisarnermut suliassatigut unammilligassanik tunngasunik ernumassuteqartarnermik toqqammaveqarsinnaanera maluginiarneqarpoq. Ernumassutaasinnaasullu tassaapput kisimiilluni imaluunniit immikkut pinartunik suliaqarnermi piginnaasatigut (sinititsineq, pilattaaneq) amigaateqarneq.


Peqqinnissaqarfiup aqutsisuisa 2016-2017-imut immikkut sulisussarsiornerminni taartaasartoqartarnermi atorfiit qinerneqartarnerisa toqqammavii paasiniarlugit aqqqissuul-luakkamik malinnaaviginiarpaat.

4. Illoqarfiit aaliangersimasumik nakorsaqaanngitsut, Nunap immikkoortuanniit nakorsanik qanoq akulikitsigisumik orninneqartarpat?

Akissut: Nakorsat aalajangersimasumik atorfillit nunap immikkoortuisa napparsimavinneersut pisariaqartitsineq najoqqutaralugu peqqissaavinnut nakorsanik aalajangersimasunik atorfilinnik peqaanngitsunut nuunneqartarput.

Kujataani, Qeqqani Avannaanilu nakorsat nunap immikkoortuisa napparsimaviinit peqqissaavinnut sivikitsukkartumik nuunneqarallartarput, ilaatigut suliassat aalajangersimasut aqqqiissuteqarfiginiarlugit ilaatigullu sumiiffinni nakorsat sivikitsumik atorfinitsitat oqilisaaviginiarlugit. Qeqertarsuup peqqissaaviani ataavartuunissaq qulakkeerniarlugu suleqatigiit aalajangersimasup atorfik ataaseq ingerlappaat. Peqqissaavinni allani tassunga assingusumik suleqatigeeqalernissaa/nikittaattoqartalernissaa sulissutigineqarpoq.

Med venlig hilsen
Inussiarnersumik inuulluaqqusillunga


Doris Jakobsen